

Parcè il furlan isal une lenghe? A Tumieç, un viaç inmagant inte “marilenghe”

L'apontament – cun Flavio Santi e William Cisilino – al jentre tal program di
“Vie dei libri - Festival letterario transfrontaliero”

Dome sessante minûts par fâ un viaç che al travierse plui di mil agns di storie linguistiche. Al è ce che al promet “Dante, ce fâstu?”, no tu sâs che... Lis buinis resons par amâ la lenghe furlane”: un event in program domenie ai 15 di Jugn, aes 17, intal Salon dal Albergo Roma di Tumieç. L'apontament – che al viodarà protagoniscj il scritôr Flavio Santi e il diretôr de ARLeF, William Cisilino – al jentre intal program di “Vie dei libri – Festival letterario transfrontaliero”, inmaneât di PordenoneLegge e dal Comun di Tumieç par promovi il dialic tra teritoris, lenghis e culturis midiant de leterature. L'incuintri al è promovût in colaborazion cu la ARLeF - Agenzie regionâl pe lenghe furlane, e al è a jentrade libare.

Santi e Cisilino a acompagnaràn il public intun percors naratîf apassionant che, partint de lenghe furlane fevelade vuê, cui siei mûts di dî e lis sôs peraulis di ogni dî, al puartarà indaûr i presints fin aes sôs lidrîs. Cun esemplis, fatarei e riflessions, si fasarà une ricostruzion di cemût che lis tantis popolazions passadis pal Friûl intai secui a vedin lassât segns linguistics ancjemò vîfs, disvelant la evoluzion e la ricjece dal furlan. No sarà une lezion di linguistiche, ma pardabon un spetacul culturâl apassionant e divertent, ae puartade di ducj. L'incuintri al ufrirà clâfs di leture ancje sul avignî dal furlan e su cemût che, plui in gjenerâl, si disvilupin lis lenghis intal timp.

A ispirâ la riflession al è stât (e al sarà domenie) nuie mancul che Dante Alighieri. Propit lui, intal so *De vulgari eloquentia*, al cite la liende medievâl de pantere, creature mitiche buine di inmagâ cul profum che e da fûr de sô bocje. Il *Sommo poeta* le doprarà par une alegorie potente dal volgâr pulît: une lenghe “che e fâs sintî il so profum in ogni citât, ma che no à la sô cjase inniò”. Duncje, ogni lenghe e à il profum de poesie, ma cemût jessi sigûrs che e deventi une opare di art e di civiltât? Il furlan al ufrìs une rispueste concrete. Fuart di une storie lungje, di une produzion leterarie tra chês plui originâls dal panorame european e di une vitalitât ancjemò intate, cheste lenghe e dimostre cemût che lis lidrîs a puedin dâ vite a une culture identitarie fuarte. L'incuintri al sarà une ocasion preziose par tornâ a scuvierzi la bielege e la impuartance dal furlan.

Tumieç, ai 12 di Jugn dal 2025

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<